

IziNtshumayelo zokuSebenzelana ekuZwaneni

55/2014 Intshumayelo ngesonto elilandulelayo elilandulelayo elokugcina emva komkhosi wobuThathwemunye, ngomhla ka 09. 11. 2014

Egameni likaNkulunkulu onguYise, neNdodana, noMoya oNgcwele.

Izwi elongamela leliviki lilotshiwe ku-2 Kor. 6:2b, lithi: **"Bheka, manje kuyisikhathi esihle kakhulu; bheka, manje kulusuku lwensindiso."**

1. Iculo 23/24

2. **Umkhuleko:** Siyakubonga Baba wethu osezulwini ukuba usiphe ithuba lokuba sihlangane lapha sidumise wena Mdali wezulu nomhlaba. Sicela ukuba ubusise ukuhlangana kwethu lapha egameni lakho. Masivikelwe nguwe Nkosi emandleni kaSathane nakukho konke okufuna ukusahlukanisa nawe Nkosi. Sikhulekela ukuthula emhlabeni wonke nokuthi izizwe zonke zidumise wena Nkosi yamakhosi. Iba nathi, Nkulunkulu Mthathwemunye, siyoholwe nguwe kuyo lenkonzo yanamuhla. Sicela kuwe amandla ukuba sikudumise ngazo zonke izikhathi sithobele izwi lakho. Konke sikucela egameni leNkosi yethu uJesu Kristu; ameni.

3. Izwi leTestamente elidala lolotshiwe kuJobe 14:1-6;

Iphistola ngohlelo lwesibili lilotshiwe kwabaseRoma 14:7-9;

Ivangeli ngohlelo lokuqala lilotshiwe ku-Luka 17:20-30.

4. Isivumo senkolo: Ngiyakholwa nguNkulunkulu uYise ...

5. Iculo 280/186

6. Umkhuleko wakhe ofundayo intshumayelo

7. **Iphistola** ngohlelo lwesithupha lilotshiwe ku-1 kwabaseThesalonika 5:1-11, lithi: "Kepha ngezikhathi nangemizuzu, bazalwane, anisweli ukulotshelwa, ngokuba nina uqobo niyazi kahle ukuthi usuku lweNkosi luza njengesela ebusuku. Nxa bethi: Ngukuthula nokuhlala kahle, khona ukubhujiswa kuyabazuma njengemihelo ifikela okhulelweyo, abasoze baphunyuka. Kepha nina-bazalwane anikho ebumnyameni, ukuze lolusuku lunifice njengesela, ngokuba nina nonke ningabantwana bokukhanya, ningabantwana bemini. Asisibo abobusuku

noma abobumnyama; ngalokho-ke masingalali njengabanye, kodwa masiqwashe, siqonde. Ngokuba abalalayo balala ebusuku, nabadakwayo badakwa ebusuku; kepha thina esingabemini masiqonde, sifake isivikelo sesifuba sokukholwa nesothando, isigqoko sibe-yithemba lokusindiswa; ngokuba uNkulunkulu kasimisela ulaka kepha ukuba sizuze ukusindiswa ngeNkosi yethu uJesu Kristu owasifelayo ukuba, noma siqwashile noma silele, siphile kanye naye. Ngalokho-ke vuselelanani, nakhane njengokuba futhi nikwenza." Amen.

8. Intshumayelo: Izwi lanamuhla likhuluma ngosuku lweNkosi uJesu eliyakufika njengesela kungazelele muntu. Siyakhumbula njalo lapho sivuma inkolo yobuKristu sithi "lapho eyakubuya khona ezokwahlulela abasahambayo nabafileyo." Phela uJesu uyakubuya ngosuku olungaziwa muntu lapho ezokwahlulela. Izwi likubeka kucace ukuthi ngokwazi nangokubona kwethu thina bantu sithi kunokuthula nokuphepha. Kephha konke lokhu esikubonayo kungashabalala noma nini.

Izwi liqinisa abakholwa kuJesu ukuthi noma lufika lolusuku akuyikubakhona ukumangala ngenxa yokuhlala silindele ukubuya kweNkosi uJesu. Abantwana bokukhanya bahlala ekukhanyeni okuyiNkosi uJesu kuthi abobumnyama ebumnyameni. Izwi lithi makuhlalwe kulindiwe ngokuba lolusuku luyakufika noma nini. Akekho owaziyo ukuthi isela liyakugasela nini. abalalayo balala ebusuku nabadakwayo badakwa ebusuku. Izwi liyakhuthaza abantwana bokukhanya ukuba bahlale bengadidekile engqondweni. Kephha kwaziwe kahle ukuthi ukukholwa okusindisayo kutholakala kuJesu Kristu kuphela. Ukuthula okungapheliyo kutholakala kuye owafela izono zezwe. Indaba enkulu iyona phela eyokuthi abantwana bokukhanya bavikelwa ngukukholwa okusekelwe edwaleni elingu Jesu Kristu konke kwakhwelwe phezu kothando nesivikelo esithemba lensindiso. Izwi likubuka kucace ukuthi uNkulunkulu akasinikelanga ekwahlulelweni nasolakeni lwakhe. Kephha usiphile insindiso ngaye uJesu Kristu iNdodana yakhe owafela izono zethu ukuze siphile kuye.

Izwi lanamuhla liyacacisa indaba yokuthi besingaba umntwana wobumnyama, kepha uNkulunkulu wasibizela ekukhanyeni ngezwi lakhe. Lokhu akwenzeki ngamandla omuntu nangokuhlakanipha kwezwe, kepha ngomusa kaNkulunkulu kuphela. Lokhu kwenzeka ngaye uJesu ngezwi elithi ungukuKhanya okukhanyisela izizwe zonke (Isaya 42; Luka 2; Joh. 8:12). Ukukhanya nokuthula kwezwe kungokwesikhashana kepha okukaKristu akupheli. Izwi leNkosi liyakhuthaza ibandla ukuba libambisane lisizane ekukholweni. Lokhu kuqinisa uthando lobuzalwane olwakhwelwe kuKristu uMsindisi okunguyena ukukhanya kwezwe. Abanye kade

sasitshelwa ngokuthi iNkosi izobuya kepha lutho. Masikhumbule ukuthi uNkulunkulu wenza izinto ngesikhathi sakhe. Okufanele sikwazi ukuthi nathi besingaphansi kobumnyama sihambe ngokukwemisebenzi yezwe ephambene nentando kaNkulunkulu. Incwadi kwabase-Efesu (Eph 2: 1ff) ikubeka kahle ukuthi nathi besifile ngenxa yezono zethu, kepha uNkulunkulu ngomusa wase wasenza saphila ngaye uKristu. Sifanele ukukhumbula ukuthi besihamba ebumnyameni, kepha ivangeli lasibizela ekukhanyeni ngoMoya oNgcwele. Lapha sikhumbula incazelo yohlamvu lwesithathu ngendaba yokuthi singekholwe nguNkulunkulu ngaphandle kokuholwa nguMoya oNgcwele.

Singakhohlwa kanjani ukuthi ziningi izinto ezidakanayo esizaziyo futhi nezisihlukanisa nokukholwa sigcine sesikhonza zona. Ukungakhohla nguKristu kungenye yezinto ezidunga izingqondo zabantu ngoba phela bebanjwe ukudakwa ngenxa yezinto zezwe. Izwi lanamuhla liyasiqinisa ukuthi sihambe ekukhanyeni okunguKristu sidade ebumnyameni. Babangaki abantu abadinwa kabi ngenxa yokunqamuka kwamandla kagesi kungalindele muntu? Siyaye sicabange ngezinto zethu ezizokonakala ngoba ungekho ugezi. Uma kusebusuku kuba mnyama abantu besabe. Asithathe ukunqamuka kwamandla kagesi sikufanise nendaba yanamuhla ukuthi kubi kangakanini futhi akuphephile ukuhamba ebumnyameni ngaphandle kukaKristu. Phela uJesu ungokuKhanya okukhanyisa ezinhliziyweni zethu kususe izono zezwe. Ngaphandle kokukholwa nguKristu sidwanguza ebumnyameni obuphakade.

Masiqaphele ukuthi izwi lanamuhla likhuthaza ukuba sihlale silindile. Lokhu kwenzeka ngokuba sicele kuNkulunkulu ukuba aqinise ukukholwa, asiphe khona ukuba sibambelele kuye kuze kube sekugcineni. Lokhu kwenzeka lapho sidumisa ngezikhathi zonke yena uNkulunkulu uYise, uNkulunkulu iNdodana, kanye naye uNkulunkulu uMoya oNgcwele. Lokhu kwenzeka lapho sihamba ngokwentando yakhe sithobela izwi lakhe. Asinamandla kokwethu ukuhlala silindile, kepha siyaholwa, siqiniswe nguye uMoya oNgcwele osihola eqinisweni ngazo zonke izikhathi. Asinamandla okufumana insindiso ngemisebenzi yethu ngaphandle kwaleyo esitholelwe nguKristu esiphambanweni. Noma kunjani kukuhle kukubi sifanele ukubheka kuKristu yena onguMqalisi noMphelelisi wezinto zonke onqobile ukufa namandla esono. Izwi lithi masikhuthazane alisho ukuthi sihleke, sihambe siphanya ngezono zabanye, sikhohlwe ukuthi nezethu sizidakile. Kepha likhuthaza ukuba ukuphenduka nokuthethelelwa kwezono kushunyayelwe ezizweni zonke egameni likaKristu (Lk 24: 47ff). Sibizelwe ukuba sihambe

ekukhanyeni ngenxa yomsebenzi kaKristu esiphambanweni. Sisindisiwe ngomusa kaNkulunkulu ngakho singabantwana bokukhanya ngokukholwa nguKristu; ameni.

9. Umkhuleko: Nkosi siyabonga ithuba osiphe lona kungekokwenza kwethu. Siyacela ukuba uqinise ukukholwa osiphe khona sivikelwe nguwe emandleni kaSathane, yena ohlala efuna ukusiholela ebumnyameni. Siphe amandla okuba sisizane emsebenzini wakho singazidumisi thina, kepha wena wedwa. Sicela konke lokhu egameni leNkosi uJesu Kristu; ameni. Umkhuleko weNkosi: Baba wethu osezulwini ...

10. Iculo 5/124

Ukuthula kukaNkulunkulu okudlula ukuqonda konke makulondoloze izinhliziyu zenu nemicabango yenu kuKristu Jesu. Amen.

Lentshumayelo ilotshiwe ngo-2008/2014 ngu-E. S. Sithole.

Ukucindezelwa nokuthunywa kwezintshumayelo kuyasekelwa yinhlangano ethiwa: Lutheran Heritage Foundation.